

畿

輔

安

瀾

志

畿輔安瀾志

寧晉泊一卷

原委

源流

堤防

橋渡

水利

畿輔安瀾志

寧晉泊一卷

原委

寧晉泊在寧晉縣東南二十五里亦卽大陸澤也一名胡盧河一名北泊

明統志胡盧河在寧晉縣東南自順德府流逕任縣至此滙爲澤卽大陸澤 明史地理志寧晉東

南有胡盧河其上流卽漳水也深冀羣川悉滙於此
方輿紀要周禮職方冀州藪曰楊紆水經注
卽大陸澤或曰古有楊城澤流紆回城下因曰楊
紆漢置楊屯縣後改爲寧晉縣縣東南大陸澤呂
氏春秋九藪趙之大陸其一也酈道元以爲卽楊
紆藪亦謂之薄洛水亦謂之廣阿澤今澤東西逕
三十里卽漳水也自順德府南和任縣達隆平而
東北滙大小羣川以注於縣境而趙州西境及滹

沱河以南諸水亦悉東南流至縣境而滙爲大澤
每至夏秋之交霖潦爲患則漳水漳沱南北交注
泛濫甚廣東注深冀二州及阜城獻縣以東至交
河縣而合於漳沱丁度曰胡盧河橫漳之別名也
在深冀間橫亘數百里冀北之大川河其最矣郡
志國朝正德十一年漳河由縣南徙明年漳沱河
由縣北徙蓋前此皆滙於胡盧河至此復分引而
南北出也 畿輔通志胡盧河其上流卽漳水與

滏水合流滙大小羣川注此土人稱爲寧晉泊卽北泊也

謹案胡盧河之名前此未之有也五代史周廣順二年契丹將高謨翰以葦筏渡胡盧河至冀州周兵屯貝州以拒之天德二年時契丹屢寇河北輕騎深入曾無藩籬之限其奔突因命王彥超等督兵民濬胡盧河宋史河渠志胡盧河源於西山始自冀州新河鎮入深州武強縣與滹沱河合其

後變徙入於大河淳化二年從河北轉運司請自
深州新砦鎮開新河導胡盧河凡二百抵里常山
以通漕運後廢金史地理志信都縣有胡盧河此
胡盧之名所始也其稱北泊者蓋因以大陸澤爲
南泊故此名北泊中又自分東南北則在灋河西
北者曰北泊在東者曰東泊在西南者曰南泊總
謂之北泊其稱寧晉泊者以其在寧晉而稱之畿
輔通志以爲土人之稱是也攷通典元和志皆以

大陸澤在邢深冀三州之地則胡盧河亦卽古大陸澤之地澤流通塞廣狹古今不同以一大陸澤而分爲二後世於是又有胡盧河之名第紀要所引水經注楊紆之文今本無之或是逸文未知何據考周禮職方冀州其澤數曰楊紆爾雅秦有楊陁郭璞注今在扶風汧縣西邢昺疏周禮冀州云其澤數曰陽陁漢志川爾雅作楊紆則陁紆通也鄭注云所在未聞又雍州云其澤數曰弦蒲鄭注云在汧縣然則

周禮弦蒲卽此楊陞也則是爾雅之楊紆信在秦而周禮之楊紆仍未詳也而楊紆旣卽爲弦蒲則周禮有弦蒲又有楊紆不已複耶且爾雅明云晉有大陸秦有楊陞郭璞注以大陸爲今鉅鹿廣河澤則大陸澤楊紆藪定分爲二是皆不能強爲之說者也乃諸志以胡盧河大陸澤廣河澤楊紆藪薄落津俱并爲一水何太無別也冀州之楊紆在漢時且未詳所在今乃欲以胡盧河實之其不足

據不待辨而明也又寧晉縣志分大陸澤胡盧河爲二謂胡盧河原在大陸澤中非謂胡盧卽大陸也或取其說謂漳溢滹沱古者皆入大陸澤諸書旣皆以胡盧河爲漳水下流則其不得與大陸澤混稱明矣故謂寧晉泊爲胡盧河者誤也則是大陸澤寧晉泊外別有一胡盧河且似胡盧河已爲大陸澤所并而今之寧晉泊竟不知於古爲何水矣可乎古今水道變遷名亦代有改易胡盧河寧

晉泊皆爲後起之名惟大陸尚仍舊稱是在古時止有一大陸澤後分爲二乃名胡盧河亦名寧晉泊耳卽以今之寧晉泊爲古之大陸澤亦無不可以以爲楊紆數則雖有水經注逸文未敢徵信也又案方輿紀要於阜城則云胡盧河在縣西北七里卽衡白晉州武強縣流入漳於景州則云胡盧河在州東北其上源自阜城縣東北流入東光縣又一統志衡漳故道遷流無定唐宋以來雖有

長蘆胡盧之異名實皆漳水下流也今漳水上流

東徙逕魏縣元城抵館陶入衛僅分一小支由廣

宗至新河與滏合滏水會衆流由寧晉泊而出至

冀州合滹沱河東注謂之胡盧河並不得以漳水

目之矣謹案順宗縣新漳河於康熙二十三年新

不復入寧晉泊一統志說者以此又謂古者漳滏所言蓋猶是昔時之形

合流而入寧晉泊自寧晉泊而下乃爲胡盧河則

寧晉泊非卽胡盧河周顯德宋熙寧河渠志熙寧八年發夫增

治胡所濟皆在深冀景滄數州之境非濟寧晉泊
盧河

也安得混而爲一其說亦似也第據宋史河渠志
胡盧河源於西山之文則胡盧河別是有源何得
云漳溢下流且所云西山不又在寧晉泊西平貫
泊者爲胡盧河而泊又爲何水耶泥於名稱拘於
今古非觸卽背矣要之大陸爲禹貢河流所過之
地其爲廣大可知故深冀景滄之間皆有胡盧河
而其源則直自西山衆水滙流而成今胡盧河下

流已不可考而寧晉泊則固胡盧河所從出也是
寧晉泊實胡盧河何疑又或以胡盧爲薄落之訛
或以爲卽長蘆之別名或以爲卽古之泚湖水經
注漳水又歷經縣故城西水有故津謂之薄落津
又云衡水分爲二水一北出逕堂陽縣故城西其
右水東北注出石門謂之長蘆水又云太白渠水
東南流謂之百尺溝百尺溝水東南散流逕厯鄉
東而南入泚湖東注衡水也豈得皆以胡盧河疑

之皆所不取 又案漳滏合流在曲周縣境滏陽
河舊自任縣大陸澤會澧河北流貫寧晉泊而出
嘉靖間發真定順德民夫萬人濬新澧河卽滏澧
曾流入泊之上流處明萬厯間滏河東徙於是洩
大陸澤於寧晉泊者惟新澧一河至滏河貫泊而
出則滏卽洩泊之河口大而流暢今惟以新挑一
河洩泊於滏滏反爲受泊之地口窄而流滯腹大
而尾閘小於是泊與滏交病隆平寧晉冀州常不

免於水患矣

入泊之河

新澧河出順德府邢臺縣之百泉河卽南澧河北澧

河也

詳見大陸澤篇

其名新澧河者由明嘉靖中重爲疏濬

故也自大陸澤北流五里逕崔家橋入隆平縣東南

境又北流五里逕舊城村東又北流二十二里逕羊

毛圪塔入於寧晉泊

方輿紀要隆平縣東十里自順德府任縣流逕縣

界又東北與沙河合注於胡盧河嘉靖十六年以故流壅塞更加䟽濬謂之新澧河

謹案隆平縣志有新澧河又有舊澧河舊澧河今已埋廢不可考

泝河其源有二一出臨縣西七十里之敦與山下東流二十里逕三峽村與臨城之水會

山海經北山經又北百二十里曰敦與之山

謹案與亦

作興泝水出於其陰而東流注於彭水郭璞注今泝

水出中邱縣西窮泉谷東注於堂陽縣入於漳水
〔漢書地理志〕中邱蓬山長谷諸水所出、元和
郡縣志敦與山在臨城縣西南七十里鵲山在內
邱縣六十三里昔扁鵲將號太子遊此山採藥因
名 太平寰宇記內邱有蓬鵲山一名龍騰山卽
漢志蓬山也 金史河渠志臨城縣有敦與山泚
水內邱有內邱山泚水 〔明史地理志〕臨城南有
敦與山西北有泚水東逕鈎盤山與泚水合內邱

有泚水 方輿紀要敦興山一名幽淮山

二水合而東流三里逕東豎村則有天臺寨水入焉
又東南流四里逕柏暢村是名三斷綠楊河則有乞
了山水入焉

太平寰宇記臨城縣柏暢亭水經云泚水東逕柏
暢亭亭在縣西

謹案水經
今無此文

舊縣志泚源有二此爲

南泚在臨城縣西南二十五里流逕柏暢亭至縣
五里許斷伏不流下二百餘步復出東逕鈎盤山

下合沙河又東南逕內邱唐山隆平抵任縣入大
陸澤俗名三斷綠楊河

又東南流逕臨城西又東南逕城南五里則有八里
溝水入焉又東南流逕鈞盤山又東南流逕西尹村
仍入於內邱縣東南境逕東尹村俗名尹村河又東
北二十二里入唐山縣西北境俗名脂溝又名沙河
又東北流逕小干言村

完和郡縣志泚水在堯山縣西一里俗亦名脂溝

唐山縣志泚水亦名沙河又東北流逕小干言

村 隋書地理志內邱縣有干言山 太平寰宇

記在堯山縣西五里衛詩出宿于干飲餞于言卽

此也

謹案正字通詩注衛所經之地今并爲一

金史地理志內邱有

干言山

謹案明統志鈎盤山相傳韓信敗陳餘於此曰魚

遇鈎盤吾其亡矣考陳餘壘在獲鹿縣東北史記

正義謂餘送死泚上爲贊皇縣界不得在此統志

之旨未知何據

又東流逕唐山縣城北又東流逕宣務山

隋書地理志柏鄉縣有宣務山 顏之推家訓柏

人城東北有一孤山闕駟九州志謂卽大麓世俗

呼爲宣務山或呼爲虛無山余嘗爲趙州佐讀柏

人城西門內碑碑是漢桓帝爲令徐整所立云上

有瓘務山王喬所仙方知此瓘務山也瓘字無所

出瓘字依字書卽旄邱之旄也

又東流逕官莊入隆平縣西境又東北流五里逕隆平縣城北又東北流二十里逕王家莊入寧晉泊

謹案泚水有二一爲南泚一爲北泚出正定元氏縣者北泚卽於元氏入槐水出趙州臨城縣爲南泚逕內邱唐山陞平入寧晉泊水經注所叙泚水蓋北泚也方輿紀要據水經注以井陘水卽泚水又謂東南流入趙州之臨城境下流亦合於胡盧河非也其所引水經注亦皆非原文又明史地理

志元氏縣泚水亦北泚任縣南和唐縣泚水卽南泚也

天臺寨水有二源一出臨城縣西北天臺山一在臨城縣少南東流逕牛口峪二水會而東南流凡十八里逕東豎村入於泚河

二統志天臺山在臨城縣西北三十里 明統志

相傳隋末童謠云豆入牛口勢不得久竇建德爲

唐所敗走至此被擒

諸案今井陘縣東南七里亦唐時牛口峪云建德被擒處考

唐書竇建德救王世充築營板渚五月自板渚出
爲陣秦王登虎牢望其軍日中戰大潰建德被創
竄牛口谷今河南河陰縣有牛口峪在縣西北二
十五里名牛口渚蓋建德被擒處也若臨城井陘
之地去幾千里能竄入
乎皆流俗之謠傳也

乞了山水發源臨城縣西南四十里乞了山東南流
合冷水村水逕灰林村中高村柏暢村凡二十里入
泚河

八里溝發源臨城縣西南二十里八里溝有泉湧出
東北流逕崇禮村岡西村水南寺凡二十二里入泚

河

蓮花池在隆平縣東北八里泝水所注今廢

午河源出臨城縣北五里泥河村之北岡亦太行支
山也東流二十四里逕鎮內村入柏鄉縣西南境東
南流五里逕柏鄉縣故城南又東南流十里逕柏鄉
縣城南又折而北流一里壞城爲濠又折而東流十
二里逕南滑北滑二村一在河
南一在河北入隆平縣西北境又
東流二十里逕黃家莊入寧晉縣東南境入於寧晉

泊

名勝志午河源出太行山麓繞柏鄉縣正南故以
午名 方輿紀要午河在柏鄉縣西十里源出臨
城縣西北諸山東流入縣境又東逕縣北三里下
流合於野河

謹案方輿紀要引舊臨城縣志泥河不言所出今
臨城縣志有泥河無午河蓋泥河因繞柏鄉城南
而得午河之名則臨城縣志自不應預名爲午隆

平縣志又有槐午河在縣北王橋村似合槐午二河爲一實譌槐武爲槐午也舊直定府志泥河謂廣武君李左車與韓信戰敗至此廣武君曰車入泥中不能行吾其亡矣與明統志鉤盤山所載陳餘事同皆無稽之說也

汾河出贊皇縣西六十里之小石門贊皇山別阜之麓也一名石濟水一名白溝水一名沙水

〔漢書地理志〕房子贊皇山石濟水所出東至癭陶

入泚 〔後漢書郡國志〕房子贊皇山濟水所出

風俗通濟水出房山房子縣贊皇山 〔隋書地理

志〕贊皇有白溝 〔明史地理志〕贊皇西南有贊皇

山泚水出焉亦曰沙水

北流十五里逕胡家菴又東南流二十五里逕贊皇

縣南十里又東流四十里逕王俄村入高邑縣西南

境又東流四里逕房子故城北又東流四里逕千秋

臺北

明史地理志高邑有黑水流會縣南之洙水 方

輿紀要房子故城在高邑縣西南十五里 高邑

縣志房子故城西連太行北環洙水 二統志千

秋臺在高邑縣南二里稍西北有觀星臺東南有

將臺三臺岡阜相連

又東流三里逕高邑縣城南又東南流十二里逕莊
頭村入栢鄉縣西北境俗謂之槐河

明史地理志栢鄉縣北有野河卽槐水也 二統

志沛河一名沙河自贊皇縣流逕高邑縣南二里
又東逕栢鄉縣北會槐河

其分支自莊頭村東逕光武廟白社村營兒村中黃
泥入於隆平縣之西南境其正支又東南流十二里
逕栢鄉縣城西北其分支南流會於城濠其正支又
東流逕栢鄉縣城北又東流十二里逕共滑村入隆
平縣西北境又東流二十里逕黃家莊入寧晉縣西
南境則有新挑河自高邑縣西北東南流入焉又東

流至北魚村入寧晉泊

謹案元和郡縣志贊皇縣濟水所出贊皇山西北
流去縣南十里此別是一濟水應劭以爲四瀆誤
也太平寰宇記贊皇縣槐水隋圖經云槐水山贊
皇山一曰渡水亦曰濟水去縣十里此是別一濟
卽詩日出宿于濟非四瀆也水西山半有元石孤
峙亭亭若楹垣故世謂之石莖東北水流積成澤
澤側有石上牛跡大小相兼十餘非人工可致觀

此則知此濟非濟漯之濟並知石濟所由名矣又
寰宇記衛詩出宿于濟今詩作沛許氏說文沛沔
也東入海濟水出常山房子贊皇山東入沔江南
徐鍇撰說文繫傳通釋云漢書房子縣贊皇山濟
水所出東至廋陶入沔此非四瀆之濟四瀆之濟
古皆作沛今人多亂之又云沛水今多作濟故與
常山濟水相亂考漢書地理志載禹貢導沔水皆
作沛則是沛與濟二字沿混久矣元吳澄撰書纂

言又云導水章所叙冀州之濟兖州之濟實一水也濟沛二字通用說文因二字而以北濟南濟爲二水非也考今說文初無南濟北濟之說南濟北濟見水經注乃四瀆之濟一水自分南北也吳說非也 又案山海經沛水東流入彭水隋書地理志房子有贊皇山彭水金史地理志臨城有敦興山彭水文獻通考臨城有彭水方輿紀要臨城縣沛水在縣北五里自贊皇縣流逕縣境合於泚水

又東北入高邑縣界謂之沛水或以爲卽彭水明
史地理志沘水東逕鈞盤山與沛水合則是沛水
卽彭水也

新溝河首起高邑縣西北十五里榆柳村東南逕張
家莊侯家莊干家莊凡二十二里入栢鄉縣西北境
又東南流十里逕郭縣故城又東南流逕小京村西
馬村北馬村南馬村北黃泥村凡十里許河流堙廢
不可復識其下流舊時入寧晉縣界入沛河

方輿紀要昔時槐午諸河每逢霖潦往往泛濫元
元貞間栢鄉令曹禎始開此溝以洩水民獲樹藝
舊真定府志元泰定時主簿陳禎重疏明成化
時縣令張君翼加濬

狗跑泉在臨城縣北三十里東流入於洺河

謹案畿輔通志縣志皆謂東入槐河蓋洺河自人
栢鄉縣上人亦名爲槐河也

槐河古沮水也源出贊皇縣西北七十里黃沙嶺亦

名渡水亦名濟水亦名黑水亦名白溝河亦名野河
亦名槐武河亦名沙河亦名泚河

謹案漢書地理志元氏縣沮水首受中邱西山窮

泉谷東至堂陽入黃河

漢志於大河止稱河無稱黃河者疑此當是漳河漳

亦作衡橫衡字通黃或橫之譌

元和郡縣志平棘縣槐水一名白

溝河南去縣二十五里隋圖經槐水出贊皇山一

曰渡水一曰濟水太平寰宇記槐水出贊皇縣黃
石山本贊皇山別阜明史地理志贊皇縣城北有

黃沙嶺巡檢司方輿紀要槐水卽野河之上源又
野河在栢鄉縣西北五里一名槐水又槐武河在
隆平縣北三十里卽野河也亦曰沙河又黑水在
高邑縣北十里卽槐河也俗譌爲淮河一統志槐
河卽古沮水也今名沙河又今之槐水卽古泚水
今之泚水乃別一小水舊志謂槐水爲泚水之別
源非是又云此爲北泚非臨城縣敦與山之水也
據諸書所稱槐以一水而名之多如是又多與泚

無別考山海經敦與之山泝水出於其陰東流注於彭水槐水出焉而東流注於泝則是槐泝同出敦與山分源而合流乃槐入泝也而漢志則似泝入槐也且漆沮爲秦地之水睢漳爲楚地之水不應在此或疑漢志沮水爲泝水之譌一統志以槐水爲卽泝水是也又諸志皆謂槐水出贊皇山黃沙嶺而或以爲出槐疙瘡或以爲出野狐泉攷野狐泉在贊皇縣西南七十里槐疙瘡特較之稍北

耳蓋黃沙嶺之水日就淤廢而野狐泉之東北流者槐河反首受焉於是河源之名亦爲所奪耳至
泚濟槐三河通流故其名亦往往相同蓋土俗之
通稱至槐武河名勝志方輿紀要一統志畿輔通
志俱謂在隆平縣北三十里土橋村卽栢鄉縣槐
河下流今槐河自趙州直達寧晉縣已不出栢鄉
隆平境古今河流遷徙不常不可執書以論也

自黃沙嶺下至黃沙嶺口東流至堵戶村河形堙廢

幾不可識

二統志黃沙嶺口在贊皇縣西黃沙嶺下北去固關一百里

首堵戶而下合野狐泉泥橙口段嶺口諸水河流始顯東流逕贊皇縣城北五里又東流十里逕東高村入元氏縣西南境

贊皇縣志縣城引槐水爲濠〔金史地理志〕舊城元氏縣有槐河〔明史地理志〕元氏縣西南有槐

水下流曰野河

又東流逕紙屯村泝水自封龍山東南流來匯自下
槐水泝水俱得通稱矣又東流逕元氏縣城南逕大
陳村入高邑縣西北境

元氏縣志舊城在縣治西北二十五里隋開皇遷
縣于槐北 一統志元氏縣城崇禎中引槐水入
濠 明史地理志高邑縣西北有黑水卽槐水也
流合縣南之沛水

又東南流逕高邑縣城南十四里又東南流逕河頭村入趙州西南境土俗名之曰沙河又東南流逕野雞鋪又東南流逕南封村入寧晉縣西北境是名槐武河又東流逕寧晉縣城南又東流至大曹莊入寧晉泊

野狐泉水發源贊皇縣西南七十里野狐村泉出太行山麓東南流逕槐疙瘡合泥橙口水入槐河

謹案土人亦謂之槐水一統志泉水湧出遂成大

河下通槐水或乃竟以此爲槐河之源非也

泥橙河水發源贊皇縣西一百里之泥橙口亦太行
山麓也東流逕槐疙瘡合野狐泉東南流逕龍堂縣
合於劉家溝又東南流入于槐河

泚河

北泚水也

發源元氏縣西羣山中東流逕南正村蘇

陽村紙屯村凡五十里入槐河

謹案

畿輔通志以此水爲泚水一統志謂今之槐

河卽泚水今之泚水乃別是一小水考泚槐二水

皆見山海經其來最古以槐爲泚又無別水以當槐方輿紀要一統志畿輔通志皆云泚水源出封龍山在今元氏縣西北五十里今泚河源出元氏縣西縣志以爲發源縣西之羣山與諸書不合明史地理志元氏西北有封龍山泚水西南有槐水下流曰野河不言二水合流則一統志所云入槐之泚別是一水是也今元氏西北有豬龍河又有南沙河皆發源封龍山與諸書泚水源出封龍之

說適符豈卽是耶然郭注山海經第云今泝水出
中邱窮泉谷不言元氏泝水豈可臆斷姑存之以
俟考

溫泉在元氏縣西南八里紙屯村其水經冬不冰居
民用以造紙卽泝水也

老僧河在隆平縣東北六里下流入于槐河

名勝志相傳有老僧尋水至此以杖卓地泉涌成
溪故名

神泉河在隆平縣北五里源出順德府唐山縣之堯
山東流逕縣北入老僧河

泥河發源臨城縣北大里泥河村西南地名平滄有
泉涌出東流逕玉家莊不要村留村孟村鎮內村凡
三十五里入栢鄉縣之南泡水是爲午河

謹案畿輔通志以泥河爲東入泚今其流爲栢鄉
縣之午河入泊不入泚方輿紀要謂臨城縣泥河
東合泚水今涸似誤

車網溝在元氏縣西南車網村起自贊皇榆底村東南流三里入于槐河

洙河源出正定府獲鹿縣

漢曰石邑

西南五十里井陘山

一名童水

漢書地理志石邑縣井陘山在西洙水河所出南

至癭陶入泚顏師古曰洙音交又音爻 太平寰

宇記洙水一名童水水經注云洙水出常山郡石

邑縣也

東流逕封龍山北則有金河會新渠水東南流入焉
又東流逕高遷村北沙河東流入焉又東南流逕牛
家莊入欒城縣西北境

史記趙武靈王二十一年攻中山王軍取石邑封
龍括地志封龍山在鹿泉縣西南四十五里蓋
山當兩邑之交也山堂肆考元氏西北有封龍
山舊名飛龍山唐改今名金史地理志欒城有
淩水方輿紀要淩水在欒城西十二里

又東南流逕趙莊元氏縣之南沙河東南流入焉又
東南流逕新莊元氏縣之金河泥溝河東流入焉又
東南流逕龍門村入趙州西北境

方輿紀要沙河在元氏縣正北八里西山諸水所
匯流也自縣境東流入欒城縣合于洹河 〔明史〕
地理志趙州南有洹河下流入于胡盧河

又東南流四里元氏縣之豬龍河東南流入焉又東
南流二十里逕邢村并陘縣之冶河東南流來匯又

東南流二十里逕趙州城南五里又東南流二十里
逕洩洋村入寧晉縣西南境又東流十二里逕寧晉
縣城南其分流寧晉渠古名新渠又東南流十四里
逕東汪村入于寧晉泊

方輿紀要洩水自趙州流逕縣界寧晉渠在寧晉
縣西南唐書地理志寧晉西南有新渠上元中
令程處默引洩水入城以溉田逕十餘里地周豐
潤民食乃甘

謹案洙河之源諸書不同漢志以爲出石邑井陘
山太平寰宇記引水經注以爲出常山郡石邑縣
又引水經注云洙水東逕飛龍山北考水經注漳
水篇引地理志曰太白渠東至曲陽入洙河者也
其稱洙河止此一語餘皆稱斯洙無稱洙水者似
水經注之斯洙未可竟以爲洙水也又曲陽今屬
定州太白渠至彼始入洙河則中間隔越滹沱唐
滋沙諸水經歷遠矣故又有東分爲二水枝津右

出之文水經注云斯浚水首受太白渠太白渠首
受綿蔓水綿蔓水上承桃水又云綿蔓水合井陘
山水水出井陘山謂之鹿泉水則出井陘山者非
浚水也且寰宇記所云水經注文今皆無之趙州
志謂其源有四一出蓮花營一出絳北村獲鹿縣志作隆
村皆在獲鹿縣南境又二泉出欒城縣竇嫗村西
北名石牛港四水交流自欒城合北沙河達于趙
州入清漳爾雅云兩水交爲浚則浚之取義不必

定因古之斯洨也然明史地理志又云獲鹿縣西有蓮花山白鹿泉出焉東流爲西河卽洨水上源也則其說又異考蓮花山在獲鹿縣西七里白鹿泉在縣西十里蓮花營在縣南四十里則所謂蓮花營絳北村寶姬村皆爲洨河所經非是河源以地理揆之則今之北沙河當是古之洨河而今之洨河則是一小水而洨之出石邑井陘一據漢志則諸說之牽合附會皆可不必矣

清水河入洺河

謹案趙州志謂發源獲鹿縣封龍山逕樂城入州境合洺河方輿紀要謂卽槐水支流自元氏縣流入趙州至城西三里有永通橋跨其上畿輔通志謂卽元氏之北沙河至州南五里與洺河合考封龍山入洺河者乃獲鹿之北沙河與元氏之北沙河其入洺俱在樂城縣境不在趙州至猶龍河亦名沙河自元氏流逕趙州合洺河而槐河之在贊

阜東流者與元氏之沙河一南一北豈卽紀要所謂槐水支流歟今永通橋所踰乃冶河也陵谷變遷殆難深考

沙河一名豬龍河發源元氏縣西山亦太行支麓也東流經胡家莊北沙灘村吳村北白婁村毛遺村趙壁村南尹村西賈村凡八十里入趙州西北境又東流二里許入洹河

南沙河元氏縣北三十里北流有三一出縣西北五

十里之割鬚嶺一出縣西北五十里封龍山一南出
仙宮寨三水會而東流逕牛家莊姬村北吳會村聊
村段村凡六十八里入樂城縣西北境河形堙廢幾
不可識

北沙河在獲鹿縣南卽元氏南沙河之支流也東流
逕獲鹿縣上寨村又東流二十五里逕寺家村入洩
河

謹案二沙河皆俗稱也特以支流旣斷又元氏與

獲鹿無別故以南北稱之

金河在獲鹿縣東南三十里起自縣之巔底村東流
逕良政村凡十二里入洺河

金水河亦名金河卽獲鹿之金河也自元氏縣東北
趙村起東流逕程村郟村董堡村凡二十里入樂城
縣西境河形堙廢幾不可識

孝河在獲鹿縣西北二十里

二統志或云卽金水河上源也

水閘渠在趙州城西南明天順間何濬所開西流入
洨河

泥溝在元氏縣東北起自縣北院家莊東南流牛家
莊凡五里入金水河

舊渠起自獲鹿縣東南塔兒潭莊南流凡七里入干
洨河

新渠二一在獲鹿縣東南之五里莊南流逕良政村
凡七里入洨河一在縣南之小宋婁村南流逕同治

村凡四里入金水河

九龍口在藥城縣西洩河夾岸凡九溝以洩諸村瀝
水

磨刀泉在獲鹿縣北小山中流逕城東又南流入于
金水河

冶河爲太白渠諸水之下流其流由平山縣城西入
滹沱河自平山縣西北境東南逕縣城之北又東而
南河形久湮不可復識又東南逕白沙村入獲鹿縣

西北境逕胡家河形漸著又東南流三十二里逕談村分爲二一東流入正南縣西南境東北流二十里逕南高家營入於滹沱河一南流四十里逕趙陂口河形久淤幾不可識入欒城縣西北境東南流五里逕冶河鋪河流始顯又名運糧河又東流二十里逕縣城北環城爲濠又南流二十里逕西安家莊入趙州北境又名宋子河又南流二十里逕趙州城西又南流二里逕邢村滙洩河

水經注綿蔓水又東逕烏子堰枝津出焉又東謂之太白渠又東逕宋子故城北又謂之宋子河

明史地理志平山縣東北有冶河 方輿紀要冶河在樂城西北隅舊時冶河自平山縣東南流逕此宋子故城在趙州西北二十五里

謹案冶河之名始見元史河渠謂上源爲甘潤河明嘉靖真定府志謂俗相傳爲漢太白渠時遇水溢逆薪橫流人爭取之以供炊爨宋金間以供陶

治之用故謂之治河又謂之運糧河此臆說也考
通鑑長編咸平五年河北漕臣景望開鎮州常山
南河入洺河至趙州以利漕是所開者南河也方
輿紀要以爲卽洺河非也今治河之由樂城入趙
州合洺河者在真定府南所謂南河故至今猶有
運糧河之稱至太白渠則水經注叙次甚詳無論
治河非專出于甘洵卽太白渠亦未可遽以爲是
也辨見滹沱河篇

七里河在寧晉縣南二十五里河身在寧晉泊內上
下源流不可考志以爲槐午諸河之下流蓋洩泊水
而注之滏陽河者自滏陽河東徙七里河與泊混而
爲一僅有其名矣

謹案寧晉縣志昔年任縣隆平水漲自張家口注
寧晉泊俗呼爲南水明隆萬間南水六月至七月
由七里河口歸滏陽八月種麥明年麥熟後水又
至田不糞而肥如是者百餘年至崇禎時大旱南

水遂絕

本朝順治二年南水復至如初辛丑夏南水突至遂成
湖沼蓋自淳沱南徙由賈家口橫絕溢水於是七
里淤爲平田泊水無歸溢之路爲害滋甚後淳沱
北徙東鹿復於泊中開水口數處極南爲史家嘴
口極北爲侯臯村口兩水口衝流日久漸有成河
之勢畿輔通志寧晉泊恃溢陽河洩水自七里河
涇塞泊無歸溢之路往往漂溢爲患舊時史家村

侯臯村二處雖有水口尙多淺隘雍正四年興修水利於浚河營上等村濬水口使淺隘之處盡爲寬深復築小隄以障水之外入設斗門以節水之內出由是積潦消而汙萊變爲沃壤矣考昔時漳溢匯流貫大陸澤寧晉泊比出自漳水斷流溢豐會行其故道及溢河東徙泊內故道又惟豐獨行今南豐之貫大陸澤者河形尙著北豐之貫寧晉泊者河形亦漸就湮又不獨一七里河已也

新挑河雍正五年起自寧晉泊南泊口爲灋河出泊之路亦洮河入泊之路也引泊水達於滏河東北流十二里逕東侯高村入于滏陽河乾隆二十八年估濬後勘爲緩工而止

引河新挑河支流也雍正五年開分洩水于滏陽河者也西起白鄧家口東北流四里逕洮口村入于滏陽河

環泊之村十七曰趙莊南丁曹汪村鋪頭村小河口

史家嘴馮家臺孟家莊新立莊耿家莊南魚莊北魚莊張家莊魚灘頭賈家莊邱莊大曹莊

泊中村九曰朱家莊曹家臺郭家莊趙家臺魚家臺劉家場徐家河王家莊

謹案寧晉泊在滏陽河之西岸下游由七里河新挑河入滏自乾隆五十三年廣陽隄廢滹水南來挾沙而行將滏河下游正身淤塞連年南徙遂將北泊淤爲平地嘉慶六年大水愈淤愈高渾水倒

漾不能抵濁泊水漫溢入滏滏河下梢不通無路
宣洩遂將東岸隄埝冲決冰趨東岸民田自六年
以後連年汕刷已成河形總督溫承惠奏請將已
成河路之處就其深淺分別挑挖使水有歸宿民
業仍安謹錄奏略於後 奏畧查得滏陽河發源
磁州經邯鄲永年曲周平鄉任縣隆平至寧晉之
黃兒營大營上村與滹水合流至天津以入于海
爲長蘆商人運鹽至正定順德廣平趙州等屬三

十餘州縣行銷要道雍正年間在正定府屬之藁城縣廣陽村築隄一道名曰廣陽隄綿亘數十里以防滹水南徙乾隆五十年間廣陽隄工漸次坍塌跌成深坑難以脩復滹水漸向南趨嘉慶四年六七月間滹水異漲致將寧晉縣交口沖決淹及河東邱頭冀州高田等村其寧晉縣之大營上村一帶河槽俱被淤塞不通舟楫嘉慶五年前督

臣

胡季堂奏請動項一萬六千餘兩借與衆商責令

前任清河道喬人傑駐工將大營上村一帶挑挖
深通未及一年仍復淤阻如故近年來因冀州新
河寧晉隄工俱有漫口通連寧晉泊鹽艘商船皆
由冀州之栢牙莊新河縣之大田莊寧晉縣之候
家口等村挽入寧晉泊前進河泊相連積潦難涸
隨專委清河道胡鈺前往逐細履勘茲據該道稟
稱廣陽隄殘廢已久僅存隄形勢難脩復黃兒營
大營上村一帶故道相距滹水甚近水稍泛漲卽

致淤塞查看大營上村橋高丈餘現俱淤平不惟挑挖不易工費浩繁卽挑濬深通一經濬水挾沙而來仍屬無益傳集沿河民人細爲詢問僉稱寧晉新河冀州三處水佔七十餘里旣不能涸出耕種情願讓出挑挖以利舟行臣查廣陽隄工久經殘廢歷任委員查勘僅存隄形卽費用數十萬金再行脩復而濬水湍激亦難保不再有冲決隄旣難復則黃兒營一帶濬水所至動至淤阻卽歲歲

挑挖亦屬無益自不能不另籌運道以利民生今
冀州寧晉水淹民地通連寧泊自嘉慶六年以後
連年汕刷已成河形所有民船並正定廣平順德
趙州等處鹽船俱由此行已屬便利舍此別無可
通之路自應將耿家莊等處分段挑挖成河俾商
艘民船不致阻滯

附載

謹案人泊諸水惟冶河舊承太白渠諸水其
上流旁入之水甚夥故是卷所載自漢

唐有名川渠附列爲多但多湮沒又上
流已斷似可不詳姑存之以俟考證

太白渠

方輿紀要在平山縣南漢時卽有此渠後漢亦常

引之晉以後廢

廣潤陂畢泓今無考

謹案唐書地理志平棘東二里有廣潤陂引太白

渠水以注之東南二十里有畢泓皆永徽五年令

弓志元開以蓄洩水利

大唐渠

謹案唐書地理志獲鹿縣東北十里有大唐渠自平山至石邑引太白渠溉田有禮教渠總章二年自石邑西北引太白渠東流入真定界以溉田天寶二年又自石邑引大唐渠東南流四十三里入太白渠今廢

井陘水

謹案水經注太白渠首受綿蔓水綿蔓水又東流
合井陘山水水出井陘山世謂之鹿泉水也元和
志鹿泉水去石邑縣十里方輿紀要云在獲鹿縣
西南自井陘縣境流入下流入于滹沱今湮

泝水

謹案水經注鹿泉水東北流屈逕陳餘壘昔在楚
漢韓信東入餘拒之於此送死泝水上其水又屈
逕其壘南又南逕城西東注綿蔓水蓋北泝也紀

要諸書誤引作南泝非也

韓臺河

方輿紀要韓臺河在元氏縣東南三里泝水之陽有土阜連屬不絕韓信出井陘攻趙嘗屯於此

畿輔通志今有韓臺村及韓臺河

福泉水在井陘縣東五十里下安村泉上有寺曰福泉寺

溫泉在井陘縣東五十里威州村又名井陘店泉上

有廟曰溫泉神祠

成郎河

謹案水經注白渠水又東南逕開縣故城北地理志常水之屬縣也又東爲成郎河此河當在藥城縣境今不可考

微水

謹案甘淘河舊以爲冶河上源是水在井陘縣東北二十五里發源縣東南六十里金珠嶺北流合

鷺毛泉又北流逕微水村入焉

鹿泉一名白鹿泉在獲鹿縣西十里

馬山河在欒城縣境見趙文奎冶河考今不知所在
回星河

謹案井陘縣志回星城縣西三里回星河今較場
是考魏書地形志井陘有回星城史記正義綰蔓
水一名回星水自并州流入井陘縣界則此河當
卽冶河之上流也

百尺溝

謹案水經注斯浚水枝津右出東南流謂之百尺溝一統志在寧晉縣東北舊志云縣東北六十里有百尺口村蓋其故瀆也

馬藏溝在臨城縣東北四里溝上有石橋

秋水潭在柏鄉縣北三十里蘇村

千金渠

謹案唐書地理志在柏鄉西又有萬金堰開元中

令王佐浚築以疏積潦今廢俗呼李家溝

澧水渠

謹案唐書地理志在明慶縣西南二十里儀鳳三年令李元開以溉田迺漕舊真定府志云在隆平城下今湮

小泊

隆平縣志在縣東北八里 舊真定府志遠望則白故名

肖店泊

舊真定府志在隆平縣多產魚藕

蒙泉在元氏縣封龍山半又有龍泉亦在封龍山
宿龍泓在贊皇西環山亭下

謹案舊真定府志謂卽槐河發源畿輔通志同贊
皇縣志以爲槐水聚處未知孰是

黑龍潭在贊皇縣西七十里

隄防

崔耿莊間在新豐河東岸崔家樓耿家莊之間上承大陸澤之水旱則蓄水潦則洩之于滏陽河無灌漑之利乾隆二十年建

蓮子坑間在新豐河東岸蓮子坑村西乾隆十三年建

西店子間在新豐河西岸西店村東乾隆十一年建
北吳疇間在新豐河西岸北吳疇村東雍正六年建

南吳疇閘在新澧河東岸南吳疇村西乾隆十二年
建

南北吳疇正閘在新澧河之中南北吳疇之間所以
蓄水爲諸閘之關鍵乾隆十二年建

謹案新澧河當大陸澤寧晉泊之中所以承澤水
而洩之泊者也大陸澤受順廣二郡之河不一數
十水惟藉新澧一河以爲宣洩已不免腹大口小
之患而隆平之民更於河中建閘則水流愈滯秋

時水至百川灌盈任縣附澤之村遂常受水患在
隆平縣民于新澧河建閘以資灌溉北方天時冬
春初夏往往乏雨農事方殷蓄水唯恐不足深夏
入秋大雨時行任民又唯恐水流不暢此二邑之
民所以常相爭而不已也夫新澧河之灌隆平田
者不及百頃而澤水之淹任民者環澤乃十六村
是則蓄水之利小而阻水之害大是在司土者有
以調劑而得其平也

舊城村閘在新澧河西岸舊城村東乾隆十一年建
五盤村閘在五盤村西國家莊閘國家在莊西俱在
新澧河東岸乾隆十二年建

謹案入泊諸水大抵皆流沙如泝洑槐通以沙河
名之可知矣故惟新澧一河有閘他無閘焉寧晉
縣志謂洙河流入縣境舊有三閘一在縣城西南
隅一在丁曹村一在東汪村皆邑人蔡駿所建明
末河淤閘亦圯廢

臨城縣護城石隄在西門外高八尺至九尺廣一丈五尺至丈七尺長二百二丈明嘉靖十四年知縣黨承美始築土隄以障泚水萬曆七年知縣余啓元甃以石二十五年建亭隄上曰息陂

本朝乾隆五年重修

神槐樹隄在唐山縣北隅舊爲泚河東岸起自孔岡訖於縣城西北隅長八里

唐山縣志前明時泚河隄數潰有神示夢於邑人

曰我城隍神也憫若等久罹水患今已植樹砥障
矣厥明視之岸畔果有槐生焉自是終明世無河
決之患土人遂有神槐之目

王福隄一名王甫隄起自隆平縣東門外東至王甫
橋長六里自王甫橋又東至湓河之牛家橋長七里
明所築疊道也

永賴隄東起任縣西訖寧晉長五十里今廢

涉河石隄在高邑柏鄉接界之莊頭村長三十六丈

高六尺寬四尺乾隆十八年築先是涉河故道湮塞
河流至是橫溢築石隄堵截挑濬河身流歸故道水
患始息

浹河隄在樂城縣境起自縣西南之南趙村迄縣南
之龍門村築於寧晉縣西長五十里高一丈寬八尺
底寬四丈五尺乾隆二十四年修

新挑河隄在寧晉縣東北長十二里高一丈頂寬一
丈二尺底寬四丈七尺乾隆二十四年築

橋渡

崔家莊橋在隆平縣東、同崔家樓村西高一丈四尺
廣一丈一尺長六丈雍正六年建又北四里爲蓮子
坑橋高一丈五尺廣一丈一尺長六丈又北四里爲
西店子橋高一丈五尺廣一丈二尺長六丈俱雍正
七年建又北五里爲北吳疇橋高一丈四尺廣一丈
二尺長六丈雍正六年建又北三里爲南吳疇橋高
一丈五尺廣一丈二尺長六丈雍正七年建又北三

里爲舊城村橋高一丈五尺廣一丈二尺長六丈雍正六年建又北三里爲王盤莊橋高一丈四尺廣一丈二尺長八丈又北四里爲范莊橋高一丈四尺廣一丈一尺長八丈又北四里爲國家莊橋高一丈五尺廣一丈二尺長八丈俱雍正七年建又北四里爲劉通橋高一丈四尺廣一丈一尺長八丈雍正六年建又北四里爲張家莊橋高一丈五尺廣一丈二尺長八丈雍正七年建又王甫莊橋在北南吳壠二橋

之中雍正五年建皆木橋

以上屬新澧河

永濟橋在臨城縣西五十里灰村甃石高二丈五尺
廣一丈五尺長八丈橋西二十里有溝順治十四年
建

廣濟橋在臨城西南十里回駕村甃石高三丈廣二
丈長十五丈明萬厯四年建

本朝康熙四十七年重修

以上屬氐河

雙虹橋在臨城縣東北三里泥河村甃石高一丈二尺廣一丈八尺長十五丈明正德中建嘉靖中重修

本朝乾隆十五年又修

莫貪橋在臨城縣東北六里不要村甃石高一丈二尺廣一丈二尺長三丈

以上屬泥河

濟涉橋一名恒陽第一橋在柏鄉縣南關外甃石高

一丈二尺廣二丈一尺長二丈八尺

通濟橋在柏鄉縣南關外甃石高一丈二尺廣一丈八尺長三丈二尺

以上屬午河

王俄橋在贊皇縣東十三里

槐水橋在柏鄉縣北五里甃石高九尺廣二丈長三丈

方輿紀要五代梁開平四年朱全忠遣軍襲深冀

晉王存勗赴救至趙州距柏鄉五里營于野河之
北及戰梁軍大敗今有槐水橋在縣北五里卽戰
時梁軍奪橋晉將李建及力戰却梁軍處也

通國橋在柏鄉縣北門外甃石高一丈一尺廣二丈
四尺長七丈明嘉靖中建

四便橋在柏鄉縣西門外甃石高一丈一尺廣一丈
八尺長三丈五尺

東石橋在柏鄉縣西門外高一丈廣一丈八尺長四

丈五尺又東爲東便橋磬石高一丈廣一丈三尺長二丈七尺皆明建

以上屬涉河

帑屯渡在元氏縣西南帑屯村泚槐二水合流處也明設今仍之

北嚴渡在元氏縣南二里北嚴村北一里當泚槐下流三晉通衢也舊設草橋明萬曆十年改建木橋冬建夏撤

韓臺渡在元氏縣南三里韓臺村俗名官渡頭槐水漲發設渡冬則架木爲梁

水漫橋在趙州南二十五里甃石高四尺二寸廣一丈三尺長二十丈五尺明時有橋久被沖沒

本朝乾隆二十二年重修水發則從橋面而過故名
以上屬槐河

蓮花橋在獲鹿縣東南三十里蓮花營

良政橋在獲鹿縣東南五十里良政村

豆姬橋在藥城縣西北二十五里豆姬村甃石高九尺廣八尺長二丈明建

趙村橋在藥城縣西北十八里南趙村甃石高七尺廣八尺長一丈九尺明建

北陳橋在藥城縣西北北陳村甃石高七尺廣八尺長一丈五尺明建

永安橋在藥城縣西南十二里永安村甃石高九尺廣七尺長二丈明建

龍門橋在樂城縣南龍門村甃石高九尺廣八尺長

二丈明建

永通橋俗名小石橋在趙州西門外甃石高二丈廣二丈五尺長十三丈

安濟橋俗名大石橋在趙州南五里甃石高二丈五尺廣二丈八尺長十五丈相傳隋匠人李春所建唐

張嘉貞李翱柳渙張彧皆有銘

謹案諸銘闕博絕麗皆與名橋不朽之作

緣是書詳于建置而畧于文詞文雖不工而可備考証亦爲節錄其餘佳文多從割愛故不載

周輝北轅錄未至趙州城五里渡石橋從空架起
工極堅緻長十三丈濶四丈隋人李春所造元祐
間賜名安濟橋有張果老驢迹

〔謹案〕太平寰宇記趙州平棘縣下引水經注云汶
水又東逕平棘縣南有石橋跨水濶四十步長五
十步橋東有兩碑汶當是汶字之譌其所引水經
注今本無之豈向本有橋而李春因遺跡而重修
之歟又宋史方伎傳僧懷丙真定人巧思出天性

趙州洹河鑿石爲橋錠鐵貫其中自唐以來相傳
數百年大水不能壞歲久鄉民多盜鑿鐵錠橋遂
欹側千夫不能正懷丙不役正工以術正之志乘
不載

丁石橋在寧晉縣南關外甃石高二丈五尺廣一丈
五尺長三丈二尺明萬厯三年重修

永濟橋一名魚臺橋在寧晉縣西十里魚臺村甃石
高二丈六尺廣二丈長三丈五尺康熙五十六年建

以上屬浹河

橫口橋在井陘縣東二十里橫口村

橫澗橋在井陘縣東北二十里橫澗村

太平橋在井陘縣三十里微水村乾隆十四年建

總督方觀承井陘縣微水鎮太平橋記畧井陘爲

縣居羣山之中而綿蔓甘陶二河一自娘子關入

一自楊莊口入滙縣二十里之橫口村又東流十

里爲微水鎮太行萬壑溪流因緣奔赴而二河回

環陘峴中當夏秋間兩岸濶絕行旅阻隔非橋不
爲功山西平遙監生梁雲賓祁縣閣成蘭子閣霖
捐貲構石橋縱四百五十尺橫二十二尺券十有
三雲賓捐金千成蘭霖捐四千金董役者邑孝廉
劉烈及劉羣康世增感其義而讓地者爲鄉人高
銘貴等橋成之日適大兵平金川振旅還京過此
以太平名橋誌事也

西河渡在井陘縣之西河村明時卽爲官渡今仍之

冶河橋在樂城縣北二十里之冶河鋪北爲往來大道
甃石高六尺廣七尺長一丈五尺明建

東橋一名凌空橋在樂城縣東門外甃石高三丈廣
二丈長十丈金太和中建明宏治間重修

四濟橋在凌空橋東南一里甃石高七尺廣一丈長
一丈八尺順治十四年建

朝陽橋在樂城縣南門外甃石高七尺廣二丈長二
丈五尺明建

昇平橋在欒城縣西門外甃石高七尺廣一丈三尺
長一丈明建

會省橋在欒城縣北門外甃石高一丈廣一丈八尺
長一丈五尺明建

秀川橋在趙州南門外明天順中知縣何濬建

以上屬冶河

永濟橋在寧晉縣東汪村高二丈八尺廣一丈六尺
長三丈五尺雍正六年建乾隆十一年重修易以石

屬新挑河

新溝橋二一在柏鄉縣北二十里故城鎮南一在高
邑縣北五里

屬新溝河

吳橋在元氏縣西十里南左村

屬北泚河

金河橋在獲鹿縣南五十里良政村

屬金河

屬金水河

石橋在井陘縣東五十里

屬七里澗 輿程記井陘縣東北五十里有石橋

跨七里澗上又東北十里爲平望橋接獲鹿縣界

宋馬宜之天威軍石橋記畧本軍東北隅有七

里澗北距煮乳嶺少轉而西接鳳山寨五龍岡諸

澗之水會於其中南入綿蔓河遇春夏之交漲甚

十數里行人阻而不通本軍人李宣乃謀于太原棲息院女頭陀善慈適軍使葛公甫下車以橋請遂同心鳩工橋乃遼陽石匠張安之作也

登封橋在元氏縣西北楊村坡西路通井陘由此可登封龍山故名

惠政橋在欒城縣西南二十里順治十三年建
以上屬南沙河

老僧橋在隆平縣東北二里老僧河明正德中建

水利

新澧河

隆平縣八閘蓮子坑閘灌本村地十餘頃西店子
閘灌本村地十餘頃北吳疇閘灌本村地二十餘
頃南吳疇閘灌本村地十餘頃舊城村閘灌本村
地十餘頃王盤村閘灌本村地十餘頃范莊閘灌
本村地十餘頃國家莊閘灌本村地十餘頃

槐河

贊皇柏鄉二縣境河身皆沙磧難以築隄建閘近
河村民各開水溝引灌田畝農工旣畢溝亦隨淤
來歲復開其溝多寡無定數長短無定制視水之
衰旺民力隨之其在柏鄉者計灌耿家等莊地二
十八頃蘇家莊地六頃石家莊地五頃北關地六
頃凌家橋地三頃張家莊地三頃方魚村地八頃
南陽村地十頃南滑村地五頃北陽村地十頃北
滑村地七頃共計灌地一百三頃在元氏縣境引

槐河水灌車網村地三頃餘漚水仍歸槐河